

NO. SOALAN: 55

**PEMBERITAHUAN PERTANYAAN BAGI JAWAB BUKAN LISAN
DEWAN RAKYAT**

PERTANYAAN : BUKAN JAWAB LISAN

**DARIPADA : DATO' SHAMSUL ANUAR BIN HAJI
NASARAH [LENGGONG]**

RUJUKAN : 8710

SOALAN:

Dato' Shamsul Anuar bin Haji Nasarah [Lenggong] minta MENTERI DALAM NEGERI menyatakan mekanisme baharu dalam menangani sindiket pemalsuan kad pengenalan di mana hampir setiap bulan akan ada kes mengenainya.

JAWAPAN:

Kementerian Dalam Negeri (KDN) memandang serius kes-kes pengeluaran dan pengedaran kad pengenalan palsu yang dilakukan oleh sindiket kerana hal ini bukan sahaja melibatkan penipuan kepada penerimanya tetapi turut menjelaskan nama baik Jabatan Pendaftaran Negara (JPN). Individu yang terlibat di dalam pemalsuan kad pengenalan boleh disabitkan kesalahan di bawah Peraturan 25(1)(e), Peraturan-Peraturan Pendaftaran Negara 1990 (Pindaan 2007) yang mana mereka boleh dikenakan hukuman penjara selama tempoh tidak melebihi tiga tahun atau denda tidak melebihi RM20,000 atau kedua-duanya sekali. Semenjak tahun 2009 sehingga Februari 2016, sebanyak 886 orang yang telah didakwa di bawah peruntukan ini.

Oleh itu, Kementerian ini melalui JPN menggalakkan penglibatan orang awam untuk menyalurkan maklumat berkenaan sindiket pemalsuan selain daripada melalui aktiviti risikan. Pendekatan ini didapati memberikan kesan yang positif terhadap usaha JPN untuk menangani kes-kes sebegini dan dipergiatkan lagi melalui hebahan-hebahan kesalahan ini kepada umum melalui media massa.

Kementerian melalui JPN juga telah mengambil langkah untuk mempertingkatkan kualiti kad pengenalan iaitu dengan mengeluarkan Kad Pengenalan Biru bertaraf Warganegara Malaysia (MyKAD) Struktur Baru yang memiliki ciri-ciri

keselamatan yang lebih tinggi. Antara penambahbaikan MyKAD Struktur Baru yang telah diperkenalkan mulai 03 Januari 2012 adalah ia diperbuat daripada bahan polikarbonat sepenuhnya dan telah diuji ketahanannya di makmal yang diiktiraf dan cip MyKAD Struktur Baru ini juga telah melalui beberapa peringkat pengujian termasuklah sebelum proses memasukkan cip ke dalam MyKAD. Antara ciri-ciri keselamatan lain yang terdapat pada kad ini adalah turisan laser pada nama, nombor kad pengenalan dan gambar kecil (*ghost image*) yang tidak membolehkan maklumat dipinda dengan mudah dan sekiranya terdapat sebarang pindaan, tindakan tersebut dapat dikesan dengan mudah. Di samping itu, agensi-agensi di bawah KDN seperti JPN, Jabatan Imigresen Malaysia (JIM) dan Polis Diraja Malaysia (PDRM) juga sentiasa bekerjasama dalam menjalankan operasi secara bersepadu bagi memantau, menyiasat dan membendung sindiket pemalsuan kad pengenalan.